

**Naalakkersuisooqatigiit isumaqatigiissutaat naapertorlugu Kujataani Itilliarsoop N 60.614 W45.46.622 ikerasaliorneqarnissaanik Naalakkersuisut suliniuteqarnissaannik peqquneqassasut Inatsisartut aalajangiiffissaattut siunnersuut.**

(Inatsisartunut ilaasortaq Kelly Berthelsen, Inuit Ataqatigiit)

**Akissuteqaat**

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

**Siullermeerneqarnera**

Itilliarsoop ikerasaliornissaanik aalajangiiffigisassatut siunnersuut pillugu Inatsisartunut ilaasortaq Kelly Berthelsen Inuit Ataqatigiinneersoq Naalakkersuisut sinnerlugit qutsavigaara.

Aallaqqaasiullugu oqaatigissavara, Naalakkersuisut eqqumaffigigaat ikerasaliornikkut immakktut angallaneq isumannaannerulersinneqarsinnaasoq. Naalakkersuisooqatigiit isumaqatigiissutaanni toqqaannartumik allaqqavoq ” Imaatigut angallannerup isumannaannerulernissaa anguniarlugu angallatit ikerasaaqqatigut angalasinnaanannut periarfissaat annertusarneqassaaq”.

Tassani Naalakkersuisut kissaatigaat inuiaqatigiit aningaasaqarnerannik nalilersuisoqassasoq, tassa Naalakkersuisunut pingaaruteqarmat nunatsinni pisuussutit iluaqutaanerpaaffiannut atorneqassasut. Kisiannili immami angallannerup isumannaatsuunissaata illersorneqarsinnaasumik pitsanngortinneqarnissaa pingaarnerpaajuaannassaaq, tassani innuttaasut, inuussutissarsiortut soqutigisaqartullu allat isumagineqassallutik.

Itilliarsummi ikerasaliorsinnaanermut aningaasartuutissanik Naalakkersuisut maannakkut missingiisinnaangillat. Naalakkersuisut taamaammat inassuteqaatigaat aalajangiiffigisassatut siunnersuut allangortinneqassasoq, taamaalilluni annertunerpaamik ilisimasaqarluni aalajangiisinnajumalluni pisariaqartunik misissuinissamik Naalakkersuisut peqquneqassasut. Aalajangiiffigisassatut siunnersuummi tunngavilersuutini allaqqavoq 1990-ikkunni naatsorsuisoqarsimasoq. Naatsorsuinerit pissarsiarineqartariaqarput, piviusorsiorlumillu suliarineqarsimanersut ullutsinnilu immakktut angallannermut piumasaqaatinut naleqqunnersut nalilersorneqarlutik. Taamaaliornikkut aalajangiinissamut tunngavissaq tamakkiisoq suliarineqarsinnaassaaq, tassani pingaartumik aningaasanut tunngasut isumannaallisaanerlu nalilersorneqassallutik.

Aammattaq ikerasaliorsinnaaneq kommunip pineqartup imaluunniit Namminersorlutik Oqartussat suliassarineraat imaluunniit ataatsimut suliassaanersoq aalajangerneqartussaassaaq.

Kiisalu nunatsinni sumiiffinni allani assingusunik pisariaqartitsisoqarnersoq ataatsimut naliliisoqarnissaanik Naalakkersuisut kissaateqarput. Taamaattumik misissuinerit kommunit suleqatigalugit ingerlanneqartariaqarput. Taamaalilluni sumi iluaqutaasumik ikerasaliortoqarsinnaanersoq, suliassallu ataatsimut qanoq akeqassanersut ataatsimoortumik misissorneqassapput. Taamaalilluni aamma pisariaqartitatut paasissutissiissutigineqartut, sumiiffiit amerlassusaat aammalu imarsiornermi isumannaassutsimut atatillugu iluaqutissat tunngavigalugit misissuinerup inernerinik tullerriaarisoqarsinnaavoq. Kiisalu aamma pinngortitamut avatangiisinullu tunngatillugu misissuisoqartariaqarpoq.

Taamatut oqaaseqarlunga Naalakkersuisut inassuteqaatigaat aalajangiiffigisassatut siunnersuut suliareqqaarneqarneratut isikkoqartillugu itigartitsissutigineqassasoq, Naalakkersuisut allannguutissatut siunnersuummik imaattumik saqqummiussinialersaarmata:

”Naalakkersuisut Kalaallit Nunaanni ikerasalianik, imarsiortunut atorneqartussanik pisariaqartitsineq pillugu nassuiaammik saqqummiusseqqullugit peqquneqarnissaannik Inatsisartuni aalajangiiffigisassatut siunnersuut. Nassuiaat kommunit suleqatigalugit sularineqassaaq, tassanilu najukkani pisariaqartitat, piffissamut avatangiisinut sunniutissanik naliliinernik suliaqarnissamut atugassamut missingiutit imaluunniit avatangiisinut pinngortitamullu sunniutissanik allanik misissueqqissaarnerit, kiisalu aningaasaqarnermut missingersuutit piffissamullu pilersaarutit tamarmiusut nassuiaasioqneqassapput. Nassuiaat 2018-imi Inatsisartut upernaakkut ataatsimiinneranni agguaassinissaq siunertaralugu sularineqassaaq.”

Aalajangiiffigisassatut siunnersuut matumuuna Inatsisartunut suliassanngortippara.